



"Joe Laveist Ballpark ta bira mucho mas cu unicamente un compleho deportivo"



A duna elogio na e trabounan cu Gabinete Mike Eman a haci pa e renobacion bira un realidad Fundacion Facilidat Deportivo Aruba ta un fundacion cu tin varios compleho nan deportivo bou di nan encargo. Parke Jaburibari, Centro Deportivo Frans Figaroa, Compleho Deportivo Guillermo Prospero Trinidad, Stadion Nadi Croes/Crismo Angela, Parke Deportivo na Yara, Parkenan Recreativo na Mabon y Simeon Antonio ta facilidatnan cu e fundacion ta maneja. For di dos aña pasa a cuminsa cu varios proyecto na e complehonan deportivo aki. Mirando e avance rapido di algun di proyectonan aki, a haci uzo di e oportunidad pa bishita nan y mira con esakinan

ta bayendo te cu awor.

E parke deportivo na San Nicolas esta Joe Laveist ta haya un bachi completamente nobo. Pa algun aña caba e manehadonan di parke, esta Aruba Sport Unie, tabata tin deliberacionnan cu Gobierno di Aruba pa drecha esaki. Dos aña pasa Gobierno di Aruba, hunto cu Fondo Desarrollo Aruba (FDA), a yega na un acuerdo pa renoba e facilidat deportivo aki. Representante di Fundacion Facilidatnan Deportivo, Sr. Karel Williams a duna un splicacion con e trabounan ta andando den e parke deportivo aki. Segun Sr. Williams, Joe Laveist ta bira un compleho deportivo y alabes recreativo multi-funcional. Den e prome fase a drecha e luznan

y awor den e di dos fase nan ta trahando riba e tribuna, e veld di baseball y di futbol. E fase aki a confronta poco retraso, pero manera Sr. Williams a indica cu semper ora bo kier crea algo nobo y tog kier mantene e mesun estructura, e ta trece cu algun problema segun e proyecto desaroya, pero a lo largo ta sali for di esaki y e compleho ta kedando bunita. Un bon ehempel ta estructura di e dak y e beamnan cu no ta dilanti di e tribuna mas, loke tabata stroba e bista di e publico den pasado. Tambe a drecha e "boothnan" y e "backstop" cu tabata mucho cerca, mester a hala esaki 10 pia mas padilanti y consecuentemente mester a cambia e sistema di e dreñahe.

E proyecto ta drentando e fase final pa loke ta tereno, caminda ta pone e tapijt di yerba artificial. Contrario na e veld di stadion di Nadi Croes/Crismo Angela, e infield di baseball ta bini completamente di santo, e resto di e veld ta yerba. Den comparacion, e mantencion di tereno di Joe Laveist ta existi un poco mas, door cu cada bes mester tene yerba y e santo nivela. E facilidat lo dispone tambe di un scoreboard nobo y un heki movibel den outfield. E motibo ta pa por acomoda e dos deportenan mas importante cu ta wordo practica den Joe Laveist, esta baseball y futbol. E idea ta pa pone tribuna den outfield pa ora di mira futbol ya cu esnan actual ta mucho leu. Segun Sr. Williams a trata na tur forma pa ubica un cancha di atletismo den e stadion. E deporte aki sigur ta uno gusta na San Nicolas, pero door cu e cancha di atletismo ta oval e no lo a cuadra cu e tereno di baseball cu ta mas rectangulo, esey tabata e motibo principal. Mester bisa cu Joe Laveist a keda hopi bunita mes y unico. Varios persona di exterior a admira esaki y nan no por ima-

gina nan mes con esaki lo keda na final.

Despues cu termina e fase dos lo inicia cu e fase tres cu lo bay ta renobacion di e cancha di basketball cual lo bira dos sala completamente cera, uno ta wordo uza pa e deportenan di bala, manera basketball, volleyball, etc. y e otro ta ser uza pa e deporte di mixed-martial-arts y otro deportenan di combate. Tambe ta bin algun sala di reunion y di estudio pa e clubnan por uza. Pues cu otro palabra Joe Laveist Ballpark ta bay tin mucho mas di ofrece cu unicamente practica deporte.

Finalizando Sr. Karel Williams a elogiar Minister Ing. Mike de Meza kende ta e iniciado di e proyecto aki, kende hunto cu Gabinete Mike Eman a haci un tremendo trabou pa percura pa e renobacion Joe Laveist. Un luga hopi central den San Nicolas unda hopi mucha di scol por haci bon uzo di e facilidat asina esaki keda cla. No mester lubida cu Joe Laveist tin hopi historia y no mester laga esaki bay perdi. Hopi deportista grandi di San Nicolas a lanta y forma nan mes den e compleho deportivo aki.